



partii naleraq

UPA 2016/116-01

14.04.2016

Kulturikkut ingerlatsineq sunngiffimmilu sammisassaqaartitsineq pillugit Inatsisartut inatsisaat nr. xx,xx.xx 2016-imeersoq.

Kulturikkut ingerlatsineq sunngiffimmilu sammisassaqaartitsineq pillugit Inatsisartut inatsisaattut siunnersuut Partii Naleqqamiit imannak oqaaseqarfigissuarput.

Kulturikkut ingerlatsinerup sunngiffimmilu sammissassaqaartitserup nukittorsarnissaat pingaaruteqartorujussuupput tapersersortariaqarlutillu.

Taamaammat kulturikkut ingerlatsineq aamma sunngiffimmi sammisassaqaartitsineq inatsisitigut immikkoortinneqarnissaat isumaqarpgut pisariaqartoq.

Nalunngilarput kulturimut tunngasut aamma sunngiffimmi sammisassaqaartitsinermut tunngasut tamarmik imartoorujussuupput, soorlu uani inatsisissatut siunnersuummi amerlasuutigut annerusumik minnerusumilluunniit nassuiaasersorneqartut.

Isumaqarpugut siuliani oqareernitsituut naatsumik oqaatigalugu:

1. Kulturimut tunngasut
2. Aamma sunngiffimmut tunngasut

Immikkoortillugit inatsisiliuunneqarpata, taakkunanga immikkut nukittorsaanissaq periarfissarissaarnerulissasoq, tassami amerlasuutigut ilaatigullu sunngiffik kultur-ilu imminnut kaputartuullugit samminiarneqartarmata.

Soorlu aamma inatsisissatut siunnersuummut uunga tunngatillugu oqaaseqaatini naliginnaasuni ilatigut allaaserineqartoq KANUKOKA isumaqatigiissuteqarfigineqarsimasoq meeqqat suli atualinngitsut pillugit aamma meeqqat atuarfimmi pisariaqartitaannut tunngasut pillugit misissueqqissaartussanik pilersitsisoqarsimasoq.

Tamatuma kinguneranik Naalackersuisut ilimasaarereerput malittarisassanik atuuttunik allannguisoqarsinnaanerani kinguneqarsinnaasoq, tassami aamma pissusissamisoortumik eqqumiitsuliornermut timersornermut aamma timigissarnermut tunngasut pillugit immikkut inatsisiliunneqarnissaat malittarisassiuunneqarnissaallu siunertaareemat.

Taama oqareerluta inatsisissatut siunnersuummi maluginiakkavut ataasiakkaat imannak oqaaseqarfigissuagut.

Naalackersuisut akisussaaffiit pisussaaffiilu inatsisikkut erseqqissarneqartut saqqummiussisummi oqaatigineqaraluartut, taamaattoq inatsisissatut siunnersuutip tamakkerlugu atuarnerani Naalackersuisut qaqugukkut ersarissumik iliuuseqarnissaannut sanilliullugu, naalackersuisut §§-ini amerlanerpaanik uiguut –“sinnaavoq” imaluunniit “sinnaapput” atortorujussuungaat malunginiartariaqarpoq, tamannalu Naalackersuisut qanoq iliuuseqarsinnaanerannut nalornisitsinertut nalilerneqartariaqarsorinarpoq, minnerunngitsumik atuisussat nalornisinneqannginnissaat eqqarsaatigalugu.

Inatsisissatut siunnersuutit kapitalit pingajuanni oqaaseqatigiit “timikkullu allatigut atugassaqartitanik” arlaleriarluni uteqattaarneqarpoq. Misissorluaraanni danskisuaa toqqaannartumik ajorluinnartumik nutserneqarsimangikkuni, oqaaseqatigiit aaliangersakkap tamakkiisup isumaginianganut naapertuutinngilluinnarput iluarsisariaqarlutillu.

Kapitali 10-imi naammagittaalliorsinnaaneranut periarfissaq eqqarsaatigalugu Naalackersuisunut apequtigissuarput, soormi Inatsisartut Ombudsmand-iat naammagittaalliorfigineqarsinnaassannginnersoq ?

Pingaartumik inatsisiliornermi kalaallisut oqaatsitta ataqqineqarlutillu sapinngisamik kusanartumik ippinnaateqarpallaanngitsumillu atorneqartarnissaat pingaaruteqartorujussuuartut isumaqarfingaarpud, taamaattumik aaliangersakkanik Naalackersuisut saneqqusisinnaanerannik §§-it ilaanni allaaserineqarsimasup allanngortinneqarnissaa kaammattuutingaarpud, isumaqaratta oqaaseq saneqqusineq atussallugu tulluartaunngitsoq, kisiannili inatsisilerinermi Naalackersuisut inatsimmik saneqqussinatik, allannguisinnaanerani periarfissaasariaqartoq isumaqarpugut. (overhaling/ændring)

Inatsisissatut siunnersuummi suli atualinngitsunut aamma meeqqanut meeqperivinniinnissaminnut periarfissaqanngitsuni, minnerunngitsumillu nunaqarfinni meeqperiveqanngitsuni qanoq periarfissaqartitsisoqarsinnaaneranut tunngasut minnerpaamilluunniit inatsisissatut siunnersuummi eqqaaneqanngillat.

Taamaammat meeqqat tamakku qanoq periarfissarsiuunneqarsinnaanerit Naalakkersuisuniit qanoq iliuuseqarfigineqarniarnersut paaserusupparput, tassami ukioq manna meeqqat ukiuat, meeqqanut atugassarititaasut eqqarsaatigalugit tamakkiinerusumik iliuuseqarnissaq pisariaqartoq isumaqarpugut, taama oqaaseqarnerput aamma ima paasineqassanngilaq, meeqqat ukiuat taamaallaat meeqqanut tunngasunik iliuuseqarfigineqassasoq.

Tusarniaanermi akissutit ataatsimiititaliami sukumiisumik sammineqarnissaat inassutingaarput, tassa pingaartumik ilaatigut meeqqat illersuisuata aamma IMAK-ip, kiisalu kommunit akissutaat nalilersorluarneqartariaqartut isumaqaratta.

Taama Partii Naleraq sinnerlugu oqaaseqarlunga suliap aappassaanneeraneqannginnerani Kultur-imut ilinniartitaanermut ilageeqarnermullu ataatsimiititaliami suliarineqarnissaa inassutingaara.